

Qalam

Bilangan 85 Muharram 1377 Ogos 1957 70 sen

Menghadapi Kemerdekaan Yang Akan Datang

Satu perkara yang patut dipuji kepada langkah yang dijalankan oleh pemimpin-pemimpin UMNO di dalam masa sebulan dua ini ialah mengadakan syarahan-syarahan kepada umat Melayu khususnya menyatakan tentang erti merdeka.

Pemimpin-pemimpin itu di dalam ucapan-ucapannya telah mengingatkan orang-orang Melayu bahawa apabila merdeka nanti tidaklah segala-galanya mesti merdeka: merdeka mengambil hak orang dan seumpamanya. Sesuatu kemerdekaan itu mestilah dengan pengorbanan dan pengorbanan-pengorbanan di dalam negara merdeka adalah sangat banyak sebab segala bebanan dan tanggungan negeri ini tidak lagi dipikul dan ditanggung oleh orang lain tetapi adalah menjadi tanggungan dan pikulan sekalian rakyat. Pikulan-pikulan itu akan menjadi ringan jika rakyat mengerti dan tahu tanggungjawabnya walaupun pikulan itu akan menjadi sebegitu berat. Pemimpin-pemimpin dengan rakyat hendaklah bersatu padu dengan membawa cogan “berat sama dipikul ringan sama dibimbing”.

Hendaknya janganlah di dalam negara merdeka nanti rakyat sahaja yang akan menderita kepayahan tetapi pemimpin-pemimpin juga mestilah menjalankan tanggungjawabnya, menjalankan tugasnya dengan seboleh-bolehnya mencari jalan meringankan tanggungan rakyat mengikut kadar kekuatan diri (negara)

dengan hasil mahsulnya – tidak menjalankan kerja-kerja yang berlebihan yang akan menjadikan bebanan rakyat sebegitu hebat dan berat.

Inilah harapan kepada pemimpin di dalam negara merdeka nanti sepihak bersenang-lenang – makan suap menjadi-jadi sedang kesejahteraan rakyat tidak diendahkan.

Pengertian tentang fahaman yang sedemikian inilah yang sentiasa dicari-cari supaya jangan kita nanti namanya sahaja merdeka, bebas daripada penjajahan, tetapi dijajah oleh bangsa sendiri.

Dengan kebijaksanaan dan langkah-langkah yang dijalankan oleh pemimpin Perikatan memberi penerangan-penerangan itu mudah-mudahan salah pengertian dan salah ambilan rakyat kepada erti merdeka itu akan hilang.

* * *

Agama Rasmi

Kenyataan-kenyataan telah diberi oleh pihak Perikatan bahawa agama rasmi bagi Persekutuan Tanah Melayu nanti ialah agama Islam. Kenyataan itu disambut dengan gembira oleh umat Islam dengan suatu harapan bahawa pertadbiran akan tersusun sebegitu rapi – tidak semahu-mahu ketua-ketua agama sahaja tentang melaksanakan cara-cara perkembangan agama buat masa yang akan datang.

Tetapi kegembiraan itu, menyambut kenyataan bahawa agama rasmi bagi Persekutuan Tanah Melayu itu agama Islam, menjadi suram sedikit apabila dinyatakan pula bahawa tidak ada cadangan atau rancangan untuk mengadakan Kementerian Agama yang akan mentadbirkan perjalanan agama di Persekutuan Tanah Melayu.

Sebab-sebabnya telah diberi bahawa kalau Kementerian Agama